


HIKAJAT
ALMARHOEM RADEN SALEH.



TERBIT DI TOKO BOEKOE.
GOAN HONG &Co.
PASSAR PISANG—BATAVIA.

1914

RALAT (SALAH) Di moeka katja pagina 7
aris ka 8 ada toelis, saja idoea, mistinja saja idoep.
aris ka 18 ada toelis, saja mera, mistinja saja merasa.
Iaka toean-toean pembatja haroes batja seperti berikoet;
Merasa senang sekali saja idoep.
saja merasa girang.



GOAN HONG & Co.
Passar-Pisang — Batavia,

HIKAJAT

ALMARHOEM RADEN SALEH.
TJERITA JANG BETOEL SOEDA KEDJADIAN
DI BATAVIA.

TATKALA PEROESOEHN DI BEKASI, PADA
BOELAN APRIL 1869.

(Tjoekoeplah 45 tahun) peroesoehan mana soeda membikin binasa Djiwanja satoe ambtenaar pemarentahan dan satoe ambtenaar Politie, dari perboeatannja Bassa Kollot (kepala peroesoehan) jang mana ia memake namanja Raden Saleh, orang soeda toedoe maoe berhinat pada Raden Saleh, jang ia tiada berdosa, dari perboeatannja Bassa Kollot atau Bassa Nellot (Kapala penjamoen Kampoeng Ratoe Djaja).

TERKOETIP DI PERNIAGA-AN.
PAKE GAMBAR.

19 TJITAK JANG PERTAMA 14.

TERBIT DI TOKO BOEKOE
GAON HONG & Co.
Passar-Pisang — Batavia.

1914.

Rentjana jang permoela'an.

Waktoe jang tiada enak bagi Raden Saleh. Pem-batja ini boekoe djoega tentoe soeda taoe orang-orang anak negri di tanah Djawa ada mempoenjai niatan boeat bikin peringetan aken kehormatannja Raden Saleh, seorang Djawa toekang gambar jang namanja soeda tersohor di antero Hindia Olanda.

Saja tiada bermaksoed aken bitjaraken ini perkara hanja dalem ini rentjana saja tjoema n·aoe oendjoek pri keada'nnja itoe orang, pada siapa nanti disam-peken itoe peringetan dan toelis satoe dan laen hal jang saja kira sadja tiada semoea pembatja taoe.

Maski begitoe, saja poen maoe toetoerken djoega sedikit di sini apa jang saja kira pembatja sceda da-pet taoe tentang halnja Raden Saleh. Beginilah :

Raden Saleh ada berasal dari kaoem regent di Semarang dan di Pakalongan, dan sampe sekarang bo-leh dibilang soeda ampir liwat satoe abad lamanja sedari toekang gambar itoe di lahirken.

Koetika baroe beroesia 13 atawa 14 taon, Raden Saleh dipenggoet (diambil) oleh toean Baron Van der Capellen, Resident Preanger-Regentschappen, dan dengen pertoeloengannja ini pembesar negri, Raden Saleh pertama dapet pladjaran dalem ilmoe menggam-bar dari seorang nama Paijen, satoe toekang gambar jang soedah tersohor, jang dateng di ini Hindia bersama hoogleeraar Reewardt, tatkala Nederland baroe mendapat kombali ia poenja kekoe wasa'an di ini pcelo poelo.

Kamoedian dalem taon 1829 Raden Saleh brangkat ka Nederland ikoet pada hoofdambtenaar, toean De Lingen, dan di sana ia ada dapet perlindoengan dari minister Baud, saorang bartawan besar dan mempoenjai banjak peugaroë Di Europa boekan sadja ia telah bisa teroesken pladjarannja, hanja djoega ia djadi bisa mengoendjcengken bebrapa negri di itoe benoea, di mana ia poenja nama djadi tersohor dari kepaddeannja bikin gambar gambar binatang.

Seperti saorang pande dan prins dari Java, bebrapa orang dari kaoem karadja'an djadi soeka pada Raden Saleh, hingga ia ini sringkali dapet oendangan aken dateng di kratonnya Radja radja Europa. Dalem taon 1852, jaitoe sasoeda tinggal di Europa 23 taon lamanja sambil plad'arken troes itoe kapandean Raden Saleh balik kombali ka ia poenja tempat kela-hiran, di mana sampe lama sekali ia troesken kepan-deannja Di Betawi ia telah diriken satoe roema me-noeroet sebagimana ia poenja kašenangan, dan roema itoe sekarang jaitoelah gedong di Tjikini, seperti Djaconessendienst.

Raden Saleh bermoela soeda menika pada saorang prampoeam bangsa Europa, tapi di hari kemoedian ia menika poela pada saorang prampoean dari bangsanja sendiri, toeroenan bangawan.

Saja kira sadja, sebab ada banjak courant jang soeda toelis itoe hal, tentoe pembatja soeda sampe tace tentang hal itoe semcea keada'an dari Raden Saleh, hingga saja merasa tiada perloe aken rentjanaken lebih djaoe itoe perkara.

Jang saja kira pembatja blon tace, jaitoelah

satoe waktoe tiada enak jang Raden Saleh soeda perna dapetken koetika ia masi tinggal di Buitenzorg, hal mana saija kira sadja ada tertjantoe troes di dalem ia poenja hati hingga ia menoetoep mata. Djikaloe di-inget, Raden Saleh ada saorang jang di hormat oleh segala bangsa soeda tentoe sadja itoe waktoe jang tiada enak ada membikin sedi sekali hatinja itoe orang pande jang namanja soeda termashoer.

Soepaija pembatja djoega dapt taoe itoe waktoe jang tiada enak bagi Raden Saleh, saija rasa tiada ada lebi baek dari pada saja salin di sini satoe toelisan dari Raden Saleh jang sasoeda aken mendjadi peringetannja sendiri. Dari pada itoe toelisan boekan sadja kenjata'an apa jang orang telah berboeat padanja, tapi djoega pembatja bisa liat, begimana Raden Saleh ada seorang jang mengarti baek dalem hal pri'kas'panan.

Raden Saleh toelis tjatetannja itoe dalem behasa Olanda, dan inilah salinannja :

„Dalem taon 1867 Bataviasch Genootschap van Kunsten en Wetenschappen poenja keada'an tiada bole di bilang ada bagoes, hingga president dari itoe Genootschap, toeann Mr. A. London soeda minta pada saija dengen lakoe manis sekali, soepaija saija soeka membantoe dalem hal mentjari barang barang koeno boeat goenanja itoe Genootschap.

Ini prenta bagi saija ada djadi satoe kehormatan, tapi orang lihatlah begimana titah itoe orang soeda bikin kliroe.

Sedikit waktoe sablon-nja saija barangkat ka-Java (Djokdja), di mana saija aken menika, pada soewaktoe hari ada dateng pada saja saorang anak

negri, jang bilang pada saija, telah mendapat kabar jang saija tjari barang barang koeno, dan kaloe saja perloe ia poenja pertoeloengan, ia poen ada bersedia aken membantoe.

Dalem pengharepan nanti bisa membikin kebae-an bagi itoe Genootschap, soeda tentoe sadja itce bantoe-an jang maoe di briken pada saija ada menggirangken sekali saija poenja hati, apa lagi dari sebab saija memang tiada sajang tenaga dan tempo boeat menambaken barang barang koeni poelannja itoe Genootschap.

Itoe sebab saija trima perminta annja itoe orang Djawa, dan saija kasi taoe padanja soepaija ia nanti soeka tjari itoe barang barang koeno boeat saija, jang mana saija nanti bli atawa teeken gambar njia.

Sasoeda liwat kira kira sapoeloe hari lamanja, itoe orang Djawa dateng kombali pada saija dengen membawa boekoe boekoe dan pandji jang di sertaken toelisan bahasa Arab, jang mana ada berasal dari toeroenannja pangeran di Djokja.

Itoe barang barang saija kasi kombali padanja, ker-na menoeroet saija poenja pendapetan, barang barang itoe tiada ada harga boeat Genootschap, dan saija kasi taoe padanja saija tjoema ing'n dapetken toelisan toelisan atawa patoeng patoeng proenggoe jang koeno.

Kira kira liwat stenga boelan itoe orang Djawa dateng poela pada saja, dan sekarang bersama sama doe orang Djawa laen, dengen membawa plaat plaat pe-roenggoe jang di sertaken toelisan toelisan Boedha.

Saija merasa girang sekali sama itoe pendapetan, dan saija laloe pergi pada toean Mr. Loudon, jang

lantas sadja minta saija bli barang barang itoe boeat Genootschap, tetapi orang orang jang poenja menerangkan, itoe barang iaorang tiada maoe djoeal, kerna marika itoe anggep itoe plaat ada seperti djimat. Dari sitoe saija djadi fjoema pindjem sadja itoe barang, aken diteeken gambar njá oleh saija poenja kaponakan, Raden Salikin, perminta'an mana iaorang loeloesken.

Sasoeda itoe semóea plaat saija ambil gambarnjá itoe barang saja kasi kombali pada jang poenja, dan itoe teekenan saija seraken pada Toean Loudobi. Saja kira sadja itoe teekenan sekarang masih ada pada toean Cohen Stuart, di Betawi.

Sala satoe dari orang orang jang poenja itoe barang kasi taoe pada saija, ia bisa dapetken lagi barang barang koeno, tapi ia merasa perloe aken saja kasi padanja satoe soerat ketrangan boeat menjataken, ia koempoelken itoe barang barang sasoenggoenja boeat saija.

Saija tanja ia poenja nama, dan ia mengakoe bernama Bassa Kollot. Saja laloë bikin dan kasi ia itoe soerat ketrangan jang begini boenjinja :

„Di bawa ini, saja Raden Saleh, djoeroe gambar dari Sri Maha Radja Olanda, mengakoe soeroe pada saorang nama Bassa Kollot mentjari barang atawa toelisan Boedha, boeat di gambar atawa dibli boeat Bataviaasch Genootschap van Kunsten en Wetenschappen.

Het Eerelid van het Bataviaasch Genootschap van Kunsten en Wetenschappen,
(w.g.) RADEN SALEH,

Tiada lama sasoeda membri itoe soerat ketrangan saja brangkat ka Djokja aken menika, dan di sana saja tinggal ampir doea taon lamanja, hingga dalem pangabisan taon 1868 baroelah saja poelang ka Bogor bersama saja poenja istri, di mana saja sewa roemanja almarhoeem Sultan Bandjermasin, dengan contract dari 4 sampe 8 taon.

Merasa senang sekali saja idoea begitoe bersama saja poenja istri jang masih moeda sampe 2 a 3 boelan lamanja, koetika pada satoe hari itoe Bassa Kollot dateng pada saja dengan membri taoe, sekarang, sebab ia denger saja telah tinggal tetep di Buitenzorg, ia hendak penoeken perdjandjiannja. Ia mengakoe ada dapetken barang koeno, antara satoe merijam jang disertaken totisan Boedha, dan bebareng ia minta itoe soerat ketrangan saja roba namanja, sebab ia sekarang boekan nama Bassa Kollot, tapi Bassa Nellot.

Saja mera girang djoega dengan itoe pendapatan marijam, dan itoe soerat ketrangan poen saja roba namanja, saja djadiken Bassa Nellot. Itoe ketrangan jang ditoelis oleh saja poenja neef, Raden Mangkoe Atmodjo, saja sraken pada Bassa Nellot, dan ia laloe pergi.

Doea atawa tiga hari kamoedian itoe Bassa Nellot dateng poela pada saja, dan ini kali ia bawa satoe ekor kambing, jang ia hadiaken pada itoe raden ketjil, dan ia bilang pada saja hendak bikin pesta aken membjar kaoel dari ia poenja anak lelaki jang baroe semboe dari penjait brat.

Ia poenja tjerita itoe saija tiada terlaloe perdoelikan, sebab itoe waktoe saja sedeng teeken gambarnja satoe matjan.

Sapoeloe atawa doeä poeloe hari kamoedian, di roemah saija ada dateng satoe orang Olanda, jang mem-bri saja taoe, di Bekasi ada petja peroesoehan, dan kabar itoe di tetepken oleh bebrapa orang laen.

Sebab perkara perkara begitoe tiada bisa menjenang-ken saja poenja batî, maka saija troes sadja bekerdja dari siang sampe malem, hingga achirnja, lantaran terlaloe banjak kerdja, saja merasa poesing, dan sam-pe 6 hari lamanja saja tiada bisa bekerdja, dan pada hari ka 7 saija misti taro linta boeat isep saja poenja dara.

Itoe peroesoehan di Bekasi, jang terjadi dalem boelan April 1869, soeda membikin ilang djoega dji-wanja satoe ambtenaar pemarentahan dan satoe ambte-naar politie, tetapi tatkala militair dateng, dengen tiada banjak soesa itoe peroesoehan soeda bisa dibi-kin padem.

Di itoe hari djoega ada dateng pada saija satoe opas dari Resident Betawi, jang kasi pada saija satoe soerat dan begini boenjinja :

„ „ „ Raden Saleh !

Kaloe ada soeka, saja minta ketrangan halnja satoe soerat jang soeda dikasi pada saorang Djawa dan disertaken dengen toean poenja tanda tangan.

Resident Betawi

(w g.) HOOGEVEEN. ”

Maski saja ada merasa tiada enak, pada itoe opas saja toch kasi taoe djoega, soepaja ia sampeken saja poenja tabe pada Resident, dan membri warta, saja

sendiri nanti dateng mengadep, sebab soeda lama saja tiada ketemoe pada kandjeng toean itoe.

Dengen lekas saja brangkat ka gedongnya toean Resident, dan di sitoe saja dapetken brapa banjak toean toean jang lagi berhimpoen, djoega ada banjak opas. Itoe semoea tiada membikin saja merasa ter-laloe heran, sasoeda saja dapet denger perkara itoe peroesoehan di Bekasi.

Tatkala saja misoek ka dalem kamar, selaennja Resident, saja dapet liat djoega ada Assistent Resident Buitenzorg, Assistent Resident Betawi, off cier van Justitie dari Raad van Justitie di Betawi, dan satoe Schout. Antara itoe toean-toean tiada ada satoe orang jang bales saja poenja pembrian tabe, hanja marika itoe semoea tinggal berdiam seperti patoeng, sedang Resident ada mengawasin pada saja dengen mata jang mentjorong dan paras jang moerka. Resident menanja pada saja :

Raden Saleh, itoe perboeatan soenggoe saja tiada kira dari kau !“

Dengen merasa sanget terkedjoet dan heran atas pertanja'an begitoe, saja laloe menanja, perkara apa jang ala pada saja. Schout Van Sprew lantas sadja bersiap aken menoebroek pada saija djikaloe perloe, dan aken lantas tangkep djikaloe saija melawan. Hal itoe blakangan baroe saija dapet taoe, dan satoe opas politie di loear roema sedeng asik tangkep saja poenja koesir dan looper jang tiada berdosa.

Officier van Justitie menanja pada saja, kaloe kalo saja adi beserta, koetika itoe orang orang djahat di kampoeng Ratoe Djaja membikin pesta.

Saja menjaoet, saija tiada biasa bergaoelan pada

orang orang begitoe matjem, dan itoe kampoeng Ratoe Djaja djoega saija tiada taoe. Sajja trangken baroe tinggal kira kira lima boelan lamanja di Buitenzorg, dan selanja itoe saija blon perna pergi lebi djaoe dari kota Batoe, bikin visite doea kali pada toean Tollens, dan selaloe saija poenja istri dan kaponakan prempoean ada mengikoet, dan kaloe soeda di preksa orang bisa dapetken boekti saija pergi lebi djaoe dari setenga paal dari itoe tempat, pembesar negri boleh anggep pada saija seperti kepala dari itoe kaoem peroesoehan.

Waktoe jang tiada enak bagi Raden Saleh. (Penoe toep) Lebi djaoe, sepandjang itoe p^epreksaan saija dapet denger, bermoela orang maoe tangkep pada saija di dalam saija poenja roema pada waktoe malem, dan bawa saija ke dalem pendjara.

Sedeng saija dipreksa, pembesar negri kasi prenta boeat kepoeng saija poenja roema, jang mana soedah kedjadian djoega: 50 orang militair bersama pembesarnya soeda koeroeng saija poenja roema, sebab saija di sangka ada kasi menoenspang itoe pendjahat pendjahat di dalem saija poenja roema, soepaija iaorang bisa semboeni.

Orang orang militair jang kepoeng saija poenja roema, hal mana saija tiada bisa seselken pada iaorang, kerna marika itoe poen ada di prenta, soeda bikin lobang di pager, kerna ia orang sangka di blakang roema djoega tentoe ada itoe orang orang jang bikin roesoe; di moeka saben pintoe di taro satoe soldadoe djaga, da*i* saija poenja orang tiada ada satoe jang boleh masoek atawa kaloewar dari itoe roema.

Jang ingin taoe itoe perkara poen tiada koerang : beratoes orang ada menonton aken mendapat taoe apa jang soedah terdjadi pada saja, sedeng didalem saja poenja roema tjoema ada saja poenja istri, keponakan prampoean dan brapa boedjang prempoean. Achterna officier van Justitie tanja pada saja, kaloe kaloe ia bole preksa saja poenja soerat soerat, atas mana saja menjaoet, itoe ada menggirangken saja poenja hati.

Itoe toean toean lantas brangkat ka saja poenja roema. Di dalem kreta saja doedoek bersama Resident. Saja tiada bisa tjeritaken begimana adanja saja poenja raša hati, koetika saja dateng di roema : saja poenja hati saola olah djadi antjoer.

Tjoba sadja orang pikir : saja poenja istri jang masi moeda, satoe prinses toeroenan Radja dan saja poenja keponakan saja moesti dapetken dengen mata jang bengkak dan mera, mengoëtjoer aer mata, bergemeter kerna merasa kaget dan takoet dari lantaran itoe semoea perboeatan jang telah dilakoeken selama saja tiada ada di roema.

Itoe saat djadi peringetan jang saja selaloe tiada bisa loepa. Toeant Musschebroek, Assistent Resident soeda beroentoeng bisa hiboerken batinja saja poenja istri.

Saija poenja istri laloe boeka semoea lemari, soepaija officier van Justitie bisa preksa itoe semoewa soerat soerat, tapi antaranja tiada ada satoe bisa kedapetan jang ada menetepken saja poenja kesalahan.

Koetika achirkja orang soedah dapet kesaksian jang saja tiada berdosa, dan djadi di sini orang soeda pitena pada saja dengen membikin boesoek saja poenja nama, boeat goena politie dan saja sendiri poenja kaperloean. Resident toch merasa djoega perloe aken saja toeroet padanja ka Depok, di mana hendak di bikin pepreksaan, siapa jang soeda goenaken saja poenja nama.

Saija menjaoet, saja soeka sekali menoeroet, asal sadja saja poenja istri poen boleh ikoet, sebab sedjak saja menika, belon perna satoe kali saja tinggalken istri saj^t sendirian, dan djoega saja kwatir itoe perkara tiada enak nanti boleh membikin ia djadi sakit.

Resident lantas sadja idzinken pada saja aken itoe hal, dan di itoe sore djoega kira kira djem poekoel 5 kita orang brangkat, diatoer seperti brikoet: bermoela kretanja Resident; kamoeidian saja poenja kreta bersama saja poenja istri, di djaga baek baek oleh satoe penggawe politie, dan achirnya kretanja Assistent Resident Betawi bersama Schout. Saija poenja kreta djadi ada di tengah, dan didjaga oleh politie, seperti djoega orang merasa kewatir, di tengah djalanan saija nanti lari bersama saja poenja istri.

Dalem perdjalanan saja poenja istri tiada brenti menangis, sampe saja poenja poendak djadi basa dari ia poenja aer mata, sebab ia taoe betoel saja tiada bersala, Saja merasa seperti djoega saja di tawan oleh itoe kaoem peroesoehan, dan boekan mengikoet pada Resident. Malem djem poekoel 8 kita orang sampe di Depok, di mana kita orang di terima dengen baek oleh pendita Benkhoff. Pada saja berdoewa istri

dikasi tempat di roema samping, di sebla dapoer, sebab itoe roemah besar ada boeat goena itoe ambtenaar-ambtenaar.

Doea soldadoe Djawa ada ditaro di depan saija poenja kamar. Jang satoe tidoer dan jang laen berdjalan pegi dateng dengen membawa sendjata. Orang masih kira sadja saija nantilari, sebab laen laen kamar toch tiada didjaga.

Pada besoknja, di waktoe sore, Resident preksa satoe persatoe orang peroesoehan di dalem marika itoe sendiri poenja kamar, dan tanja pada ija orang, apa betoel ija orang ada liat Raden Saleh di dalem pesta di Ratoe Djaja. Itoe semoea orang menjaoet, marika itoe betoel ada liat Raden Saleh, jang dadanja disertaken semoea behadari kahormatan.

Resident lantas minta saja berpakean, tapi dengen tiada pake itoe semoea behadari, sebab di kwatir itoe orang orang kaoem peroesoehan nanti tjoema liat sadja itoe bahadari, dan tiada kenalken saija poenja diri, kerna marika itoe semoea ada koeli koeli jang goblok.

Kamoedian, sambil oendjoek pada saija, Resident tanja pada itoe orang orang, apa saija, adanja itoe Raden Saleh jang marika itoe dapet liat di dalem itoe pesta, atas pertanja'an mana marika itoe menjaoet, boekan saija adauja, dan saija poenja roepa poen sama sekali tiada sama seperti itoe Raden Saleh jang ada di pesta.

Tjoema 2 orang sadja jang taoe saja poenja nama, jaitoe saorang lelaki jang doeloe soeda perna liat saja di Tjekini, dan saorang prempoean toea oemoer 60 taon, jang me ngakoe sambil bergemeter, ia soeda liat saja didalem itoe

pesta. Itoe pepreksaan dibikin pada waktoe malem, dan tjoema ada satoe lampoe sadja.

Besoknja Resident prenta gleda badannja itoe semoea peroesohan di dalem pendjara (gredja dan roemah sekola digoénaken boeat pendjara sedikit tempo), dan itoe orang prampoean djoega di tanja kombali. Ia ini menjaoet sambil menangis dan badan gemeter, ia soeda kliroe liat, kerna kemaren malem ada glap, sedeng ia soeda toea dan matanja soeda lamoer; ia minta dima'afken. Resident mengoetjapken perkataan: „ „Soenggoe ane sekali!“

Labi dari 26 orang jang dirante dan di iket telah ditandja, tapi semoea itoe menjaoet satoe roepa blon perna dapet liat pada saja lebi doeloe dari ini waktoe.

Sekarang Bassa Kollot atawa Bassa Nellot jang moesti dipreksa. Ini orang mengakoe, soeda bangoenken itoe peroesohan dan kapalain itoe pestadi Ratoe Djaja, di mana ia soeda goenaken djoega saja poenja nama. Saja laloe minta bitjara pada Resident, pada siapa saja berkata begini: „ „Resident, inilah Raden Saleh, dan itoe Raden Saleh!““ Saja bilang begitoe bermoela sambil oendjoek pada diri saja sendiri dan kemoedian pada itoe pendjahat, Bassa Kollot (Nellot).

Sasoeda itoe pepreksaan slese, saja balik kombali ka dalem saja poenja kamar; itoe soldadoe djaga soeda dikasi laloe, kerna dirasa soeda tiada perloe lagi. Saja poenja istri peloek pada saja sambil menangis. Ia bermoela kira saja bakal ditoetoep di dalem pendjara, sebab pembesar negri ada lebi pertajija pada itoe segala tjerita djoesta dari itoe koeli koeli goblok.

Pada besoknya saja berdoea istri poelang ka Buitenzorg, dan membikin saja merasa amat heran pada besoknya lagi saja trima datengnya brapa banjak toeantoean dan njonja, begitoe djoega rahajat Djawa, jang semoea membri slamet pada saja aken itoe pepreksaan jang bikin bersi saja poenja nama. Pada semoewa orang itoe saja kasi taoe, marika itoe poenja pembrian slamet ada sanget menggirangken saja poenja hati, sebab itoe ada djadi boekti, sobat sobat jang saja ada poenja, semoewa ada sobat sobat jang berhati djoedjoer dan saja hargaken sekali pikiranunja orang banjak tentang hal saja poenja perdjalavan; tetapi sebab saja taoe betoel, pada saja poenja nama tiada bisa berlengket noda, maka saja pandang itoe pembrian slamet tiada beroena.

Begitoelah kasocdahannja itoe toeloehan pada saja dan saja ingin menanja, apa betoel saja ada bersala. Saja merasa sakit hati, lantaran moesti ditoedoe kerna tiada bertrima pada satoe bangsa (Olanda), pada siapa saja ada beroentoeng kebaean aken saja poenja nama, pladjaran, pendapatan dan pengatahoean. Ja, djikaloe sekarang saja bisa dapet ini keada'an itoe semoea ada boedinja bangsa Olanda, jang saja tjinta sekali, dan saja poenja sasoeatoe tetes dara jang pengabisan saja nanti goenaken boeat itoe bangsa djikaloe ada perloenja.

Saja poenja hati ada merasa sakit, kerna ditoedoe oleh brapa orang soeda maoe berhianat pada saja poenja Radja (Olanda), menoetoep moekanja Gouvernement, dan tiada bertrima pada bangsa Olanda.

Apa saja, jang soeda tinggal 23 taon lamanja di Europa, di antara orang orang sopan, di sini saja moesti rendaken deradjatnya saija dengen bergaoelan sama itoe segala bangsa dan pendjahat, aken bersakoetoe pada itoe segala kaoem peroesoehan boeat melawan pada Gouvernement, jang sampe sekarang masi sadja troes berboewat kabaeaan bagi saija ?

Senioewa orang jang kenal betoel pada saija, tiada nanti maoe pertjaija itoe hal. Sampe saja memboewang napas jang pengabisan, saja selaloe nanti inget: „Hormat pada Allah, setia dan bertrima pada Radja dan Gouvernement, bagitoe poen pada bangsa Olanda“.

Begitoe Raden Saleh soeda tjeritaken itoe hikajat jang sanget tiada enak bagi dirinja. Roepa roepanja itoe perkara soeda bisa terdjadi pada itoe toekang gambar jang berdjasa, tjoema dari lantaran bebrapa ambtenaar soeda djadi bingoeng dari lantaran itoe keriboetan, dan tjoema sedikit sadja Doega'nnja, soeda toedoe maoe berhianat pada almarhoem Raden Saleh, saorang jang terhormat tinggi, jang telah bebrapa taon lamanja tinggal di Europa dan dapet anoegranja Radja.

Kamoedian dari pamerenta, itoe bebrapa ambtenaar jang soeda berlakoe begitoe tjerobo, soeda dapet tegoran jang tiada manis, tapi orang djoega tentoe bisa mengarti sendiri, itoe perboeatan ada sanget meloe-kaken hatinja Raden Saleh.

Demikian pada almarhoem Raden Saleh soeda bisa terdjadi perkara jang begitoe.